

ეპისკოპოს ლეონიდეს (ოქროპირიძე) წერილი ეპისკოპოს კირიონისადმი (საძაგლიშვილი) - 1907 წელი



თქვენო მეუფებავ,

დაუვინყარო მღვდელმთავარო კირიონ!

მოგილოცავთ ძმური სიყვარულით ბრწყინვალე აღდგომას და ვთხოვთ მაცხოვარს
თქვენი სახელოვანი და გმირული სიცოცხლის მრავალშამიერობას!

ყოვლადსამღვდელო! თუ თქვენი აქ არყოფნა ვისმეს მოაკლდა,-ეს გახლავართ
პირველად მე: აღარა მყამს მომხრე, ყველას ენა მუცელში ჩაუვარდა, ყველა თავის
სოროში იმალება, კრინტს ველარავინა სძრავს, ყველა კურდღლათ და დედალ ქათმად
გადაიქცა. მარტო ერთი ვერაფერს ვხდები და ტყუილუბრალოთ თავქვას ვახლი.
თქვენი თოდესაც ბურგი გამაგრებული მქონდა, ცა ქუდათ არ მიმანდა და დედამინა
ქალამნად, ეხლა კი, ბურგნამხდარი ცხენივით, ცაში კაჭკაჭის გაფრენაც საგონებელში
მაგდებს. ჩვენი სილაჰრით გამარჯვებულებმა აღარ იციან როგორ იდღესასწაულონ
თავიანთი დღესასწაული, როგორ გაგვთელონ, გაგვანადგურონ, ყერით გაგვწელონ და
მტვრათ გვაქციონ. ოჰ, ღმერთო, როდემდის, როდემდის უნდა ვიტრიალოთ ამ
ჯოჯოხეთ საკირეში და გავარვარებულ თონეში. ნეტავი სულაც შეგნება არ მქონდეს, ან
ისე ვიყო აგებული, რომ ადვილათ ურიგდებოდე და ვეთვისებოდე ცხოვრების

ყოველგვარ პირობებს... სადღესასწაულო არაა ეს გრძნობა, მაგრამ სხვა რა გვაქვს სადღესასწაულო?

მანდედამ მაინც მანუგეშეთ წერილებით: როგორ მოხდა თქვენი გადაყვანა, როგორ მუშაობდით პეტერბურგში ჩემ შემდეგ, როგორ მოეწვეთ ახალ ბინაზე და საზოგადოთ როგორ გრძნობთ თავს.ოღონდ კარგად იყავით, თორემ სამშობლოს მანდედამ უფრო მეტ სარგებლობას მოუტანთ, ვინამ დასაწვავ სოხუმიდან.

აქაურ ამბებს დაწვრილებით არ გწერავთ, რადგანაც ყველაფერი საწყენი და გულსაკლავია.

კვლავ მოგილოცავ ქრისტეს აღდგომას და გისურვებთ სიცოცხლეს.

უთქვენობით მხარმოტეხილი და ობლად დარჩენილი ეპისკოპოსი ლეონიდი

ქ.ქუთაისი

1907 წ. 18 აპრილი

[კ.კეკელიძის სახელობის ხელნაწერთა ინსტიტუტი.კირიონის ფონდი, ს.895]

[მსოფლიო საეკლესიო სიახლენი](#)